



Museo Historico ta celebra "Dia Internacional di Museo"

Awe, 18 di Mei, ta Dia internacional di Museo



ORANJESTAD (AAN): Pa añanan caba Museo Historico ta siguiendo e tradicion di

ICOM (International Council of Museums) pa celebra e dia aki conhuntamente cu



comunidad di Aruba.

E celebracion mundialmente aki a cuminsa na 1977 y ta un dia riba cual tur museo ta pone un tiki mas atencion cu normal ariba nan existencia, nan significacion y nan derecho di existencia.

ICOM ta defini museo lo siguiente: un institucion na servicionan di comunidad y su desaroyo.

Den 2006 ICOM a scohe como tema: "Museo y hobennan".

E tema aki a worde scohi pa ICOM pa trata di stimula participacion y concientizacion di hobennan den y pa e trabao di museo.

Mundo ta cambiando y cada desaroyo tin su efecto, tambe riba museonan. Y bunita lo ta si por logra sincronizacion di ideanan di hobennan y trabao practico diario di nos museonan pa logra stipula un vision pa nos museonan pa siglo 21 y hasta pa siglo 22!

Nos hobennan di awe ta e futuro generacion di bishitantenan di museo y kisas trahando como profesional den Museo mañan. Trahando pa hoben y cu

hoben, institucionan cu tin como tarea principal pa salvaguardia Aruba su herencia cultural y historico mester por logra intercambio activo di idea y informacion necesario pa [re]defini nan vision y mision pa nos hobennan di mañan, por realiza y comprende e necesidad y importancia di un museo pa su comunidad.

Nos di Museo Historico kier a comparti cu comunidad Arubano un parti di nos coleccion riba e dia special y aki nos ta enfoca riba e historia di aloë:

PLANTACIONNAN DI GOBIERNO

Entre 1839 y 1845 awa casi no tabata yobe y comercio den e colonia 'Curaçao' tabata abao. Despues cu e fiebre di oro a pasa, Aruba a cay den pobreza y pidimento di limosna. Hasta esnan den mihor posicion financiero a muda pa Venezuela pa asina scapa di hamber, lagando nan cunucu y hasta esclavonan bandona. Pa drecha economia gezaghebber Reinier van Raders

(1836-1845) a lanza e plan pa cultiva productonan comercial: katuna, aloë y cochenille.

ALOË

Cultivacion di cochenille a resulta di no ta productivo, pero aloë a bira e producto di exportacion mas confiabel di Aruba. E doñonan di plantacion tabata tene plantacionnan di aloë. E cunukeronan tabata tin nan propio terenonan chikito di aloë. Un bez pa aña nan tabata corta e matanan di aloë.

• Nan tabata laga e aloë lek den un baki. Asina nan tabata haya e azeta;

• Despues nan tabata concentra e azeta door di herbe den un ketel di koper;

• E azeta concentra tabata ser exporta den cahanan di palo pa Europa y Estados Unidos;

• Despues tabata procesa e productonan di aloë den un laxativo of nan tabata usa e aloë como ingrediente pa medicina.

Te na 1951 ainda Aruba tabata responsabel pa 30% di e produccion mundial di aloë. E museo di Aruba Aloë Balm na Hato ta conta e historia di aloë na Aruba.

Comunidad di Aruba ta worde cordialmente invita pa bishita Museo Historico diahuebs awor, 18 di mei.

Entrada ta gratis!!! Y cada bishitante ta worde yama Bon Bini cu un dushi awa di lamoenchi pa refresca!!!!

Y tambe directiva y personal di Museo Historico kier a felicita tur Museo existente aki na Aruba riba nan dia. Y tambe gradiciendo un y tur cu cada biaha ta yuda Museo Historico yega su me.